

冠軍

〈謁杜甫草堂〉

施純志

水曲村幽草屋卑，劍南避亂此棲遲。
卜居乍喜溪山麗，落筆轉多家國悲。
赤膽許身同稷契，白頭寄食愧妻兒。
今瞻勝地人如織，卻憶秋風夜雨時。

評語：以尋常始，以不尋常終。頸聯警動，結語淒迷。

公開組

亞軍

〈過觀象臺〉

李裕韜

迢遞銀河若峙棋，司天製曆玉衡持。
侵祥星緯流年卜，晴雨農時節氣推。
物理深微差可究，世情譎詭孰能窺。
三秋瘟癘絲絲際，垂象何曾應劫危。

評語：敷陳有度，哲理昭然，發人深省。

季軍

〈悼珍寶海鮮舫〉

吳略

龍宮玉闕竟何尋，縹緲蒼穹碧海深。
身倚南灣孤月照，名揚西域眾星臨。
色衰無奈千夫棄，心死寧將百寶沉。
甘逐浮槎從此逝，空餘太白唱遺音。

評語：婉轉託諷，深於比興，得風雅之意。

優異獎

〈春遊沙田萬佛寺〉

王維偉

誰將磴道化檀林，長牖群蒙契佛心。
八指梵音縈廣宇，三春淑氣沐青岑。
頭陀望裡香城小，山客談中禪意深。
莫笑車塵妨悟道，千尋塔向舊鈔尋。

評語：溫醇雅健，逸興盎然。

〈八大山人冊頁〉

李藝明

筆痕簡淡氣淋漓，幅幅荒寒物物欹。
莫問滄桑千百感，須看榛棘兩三枝。
託身道也兼僧也，觸緒哭之還笑之。
寫得鳥魚同閱世，向天白眼適其宜。

評語：悵悵切情，讀下為之辛酸。

〈網絡遊戲英雄傳〉

李敬邦

一世庸愚素自知，寄情網絡夢飛馳。
天生瑜亮從來少，秒殺關張未足奇。
身在江湖誰掌劍，心超宇宙我觀棋。
武林霸業皆遊戲，魂斷無須烈士碑。

評語：氣韻生動，雋語盈篇。

〈讀汪精衛獄中諸詩有感〉

周鍵汶

山梅錯落滿亭陰，畫遍秋棠不是林。
卻笑椎秦酬博浪，曾矜啣石擬冤禽。
木從冰雪移堅節，花感桑榆變夙心。
待聽黃雞天欲白，惟拈墜葉寄微吟。

評語：佈局精妙，句句有來歷。

〈路燈〉

張平開

飄輪往復吼雷音，漸見蒼茫暮色臨。
不避市塵甘冷落，為防世道陷昏沉。
立身早定千尋榦，照夜常存一寸心。
天未曙兮光未息，宵宵風露漫相侵。

評語：立意新穎，餘味無窮。

特別獎

〈與 ChatGPT 聯句有感〉

杜文彬

虛擬智能橫出世，梳文櫛字冠於今。
編程裁出短長句，代碼敲成平仄音。
藻思千行皆數據，核芯一片是詩心。
分明不識愁滋味，也學騷人作苦吟。

評語：筆調俳諧，不乏雋語。

〈夜聞鷺雀〉

溫仲斌

亂攪閒愁入夢思，問君何事獨啼悲。
莫驚風雨懷孤抱，豈效鷓鴣安一枝。
牢落天涯春寂寂，微茫月色夜遲遲。
他年振翮圖南去，可憶羈人不寐時。

評語：愁多難遣，盡是傷心人語。

*優異獎及特別獎排名按姓名筆畫序

第三十三屆

全港詩詞

創作比賽

律詩

The 33rd Chinese
Poetry Writing Competition

得獎作品

第三十三屆全港詩詞創作比賽——律詩

公共圖書館自一九九一年起舉辦「全港詩詞創作比賽」，單年比詩，雙年比詞，旨在提高市民之中國語文運用及韻文欣賞的能力。今年舉辦的「第三十三屆全港詩詞創作比賽」，已是第十七度的「律詩比賽」。

評審委員有何文匯教授、陳煒舜教授、黃坤堯教授及劉衛林教授。

比賽分學生組及公開組，題材由參加者自定，五言或七言律詩不拘，用韻則限用「四支」及「十二侵」二韻。是屆的參賽者非常踴躍，共收到八百多份參賽作品。學生組參賽者來自各大專院校及高中學生；公開組參賽者則來自社會不同階層。是屆參賽者的作品水準甚高，評審委員經初選、複選，反覆討論，才能決定名次。為確保評選公正，整個評審過程均以糊名方式進行。評判團更約見學生組入選參賽者，並請學生們即席對聯，才定出優勝作品。

冠軍

《流星》

蔡明峰

香港教育大學

霄漢閒拋淚，人間仰望時。
飛來三兩點，偷去萬千思。
未盡呢喃意，空成悵惘辭。
生為天地客，明滅本無期。

評語：思玄觀妙，別出心裁，足以發人深省。

學生組

亞軍

《過揚州悼史忠烈公》

邵帥

香港理工大學

紫宸已散山河破，一旦孤城鐵騎臨。
嶺外梅花哀累塚，池邊喬木泣殘襟。
難知孺子終成事，未曉精忠是此心。
但使君王從善道，何需搦管自沉吟。

評語：筆力渾厚，結語沈痛，是詠史佳作。

季軍

《讀南宋女詞人嚴蕊詞有作》

鄭至欽

香港珠海學院

纖影神傷對牖枝，山花一折一相思。
相思難復武陵夢，悵別徒吟紅杏詞。
夜雨潺潺臨古寺，禪鐘陣陣動芳帷。
聲凝月隱空林澗，卻照幽姿再起時。

評語：婉約雅逸，惆悵關情，是傷心人語。

優異獎

《霧中登山有感》

侯嘉淇

聖公會梁季彝中學

千山萬壑雲煙掩，白霧巖崑往去疑。
越嶽登高過竹舍，行舟渡水見瑤池。
鷗如洛女遊神渚，我似陳王賦麗辭。
一滴沾襟塵夢醒，清風弄葉笑頑痴。

評語：如夢如幻，亦莊亦諧。

《虎豹花園》

葉雅琳

嶺南大學

開園欲使往來知，腹構奇形託斧椎。
白塔臨風雲入袖，青天飛雨海翻螭。
身蟠揖客松槐老，壑側嘶林虎豹飢。
漸看樓高飛鳥盡，蕭蕭冷徑露苔滋。

評語：尋常見奇崛，壯麗見蕭條。

《漢魏洛陽故城感懷》

曹睿文

香港理工大學

新雨撒蒸暑，孤城竟可尋。
粟苗猶曳曳，曠野靜愔愔。
柱礎沒塵土，銅駝鬱樹林。
東牆登望處，最是闕胸襟。

評語：懷古情深，不勝今昔之慨。

《癸卯仲春弔衢雲先生有感》

楚舒霖

香港理工大學

高懷仰止梅空食，對墓咨嗟有鼠思。
三界銜哀憾銷骨，九疇仙逝泣春祠。
功名未勒難求樂，隱跡群碑總感悲。
慰藉羈魂須用酒，興中志士共傳卮。

評語：筆力剛勁，結語沈雄。

《勉友》

熊雨佳

香港城市大學

杏榜題名將對策，如何躑躅起愁思。
文章縱恣人皆譽，品格奇殊孰不知。
匣劍應期鋒出日，囊錐且待穎穿時。
乘風跨月凌雲去，徑取長安第一枝。

評語：憐才勵志，仁言藹如。

特別獎

《傷逝》

李美英

香港城市大學

星耿蒼冥未覺時，燈昏踱步起哀思。
秋蟲已死青雲志，暮雀空鳴白髮悲。
去日苦多花泣露，今朝酒冷月留枝。
無心尋覓蓬山遠，三宿人間桑下宜。

評語：淺白流暢，用晦而明。

《霧裏中秋夜》

羅梓鍵

聖公會梁季彝中學

迢嶢玉闕輕紗蔽，靜夜微風濁酒斟。
碧海蒼茫孤燕過，巫山暗晦晚猿吟。
良辰聽雨青梅澀，獨影傾壺客緒深。
賴托吾身何處是，鄉關日夕苦追尋。

評語：寂寞情懷，貫注全詩。

